

四庫全書

子部

欽定四庫全書

通雅卷十七

明 方以智 撰

地輿 九州建都考略

九州分合以禹所作者為正 周禮疏云自神農以上
有大九州黃帝乃於神州內分九州騶衍所云赤縣神
州是也外有大瀛海大九州淮南墜形訓東南神州農
土正南次州沃土西南戎州滔土正西弇州開土正中
冀州中土西北台州肥土正北濟州成土東北薄州隱

土正東陽州信土臆造名耳帝王世紀云冀兗青徐揚
荊豫梁雍九州顓帝所建帝嚳受之葉氏曰祭法共工
氏霸九州其子曰后土能平九州九州之名舊矣舜十
二州冀兗青徐揚荊豫梁雍幽并營漢地理志云堯遭
洪水天下分絕為十二州禹平水土更制九州與孔馬
之說異禹九州冀兗青徐揚荊豫梁雍帝王世紀云堯
遭洪水分為十二州今虞書是也及禹平水土還為九
州今禹貢是也山海經稱禹使大章步自東極至于西

垂二億三萬三千五百里七十五步豎亥步南極盡于
北垂如之言步筭也爾雅九州兩河間曰冀河南曰豫
河西曰豳漢南曰荆江南曰揚濟河間曰兗濟東曰徐
燕曰幽齊曰營孫炎曰此蓋殷制以異禹貢周禮耳陸
氏曰禹貢有青徐梁而無并幽營爾雅有徐幽營而無
青梁并職方有青幽并而無徐梁營蓋周九州揚荊豫
青兗雍幽冀并又中土作白土台州作柱州濟州作玄
州薄州作咸州信土作申土 四極四荒非立圓當以

地球五大州準之 爾雅泰遠邠國濮鈐祝栗曰四極
觚竹北戶西王母日下曰四荒邠說文作汭國觚竹者
漢地理志遼西令支有孤竹城在平州盧龍縣南唐平
州今永平府也北戶者即日南郡西王母者西荒經崑
崙之丘有人戴勝虎齒曰西王母穆天子紀其跡于弇
山名曰西王母之山日下者日所出處其下之國倭一
名日本自云國在日邊呂覽曰東至開梧南撫多類西
服壽靡北懷儋耳四極內東西五億有九萬七千里南

北亦然尸子曰有君長者東西二萬八千里南北二萬六千里張平子靈憲云八極之維徑二億三萬二千三百里南北則短減千里此非立圓也今太西以天球地球應度二百五十里移一度則知地周九萬里計地面至中心隔一萬四千三百十八里零十八丈愚者歎曰莊子以六月息九萬里表法已知之邪極九六而閤合耳十二而舉其半猶六爻之藏萬理也騶衍大九州縣臆耳修多羅香水華藏圖如塔然表心量耳今資太西

之質測以証周髀歸于河洛則不定皆一定矣乃悟聖人之差別智本易簡也

郡縣大小不一春秋郡屬于縣戰國後縣屬于郡周書作雒篇曰千里百縣縣有四郡說文引之智按周官有在鄉之縣有在遂之縣有采邑之縣有閒田之縣故王畿謂之縣其名不一有以一村為一縣者矣呂氏曰春秋時郡屬于縣趙簡子誓衆所謂上大夫受縣下大夫受郡是也戰國時縣屬於郡秦紀惠文十年魏納上

郡十五縣是也方孝公商鞅時并小縣為大縣縣一令
尚未有郡牧守稱及魏納上郡之後十餘年秦紀置漢
中郡或者山東諸侯先變古制而秦效之與戰國策楚
王以新城為主郡是也漢興置立諸侯王國武帝開廣
三邊故自高祖增二十六文景各六武帝二十八昭帝
訖於孝平凡郡國一百三侯國二百四十一晉志云郡
國一百十一而漢志云一百三或有未考也元封五年
初置部刺史十三人通典云十三部不常治後漢司隸

治河南今河南府豫治譙今亳州充治昌邑今兗州府
金鄉縣金鄉猶有昌邑城徐治郟今邳州青治臨淄今
青州府涼治隴今鞏昌府之秦州秦安縣非今鳳翔府
之隴州也并治晉陽今太原府冀治鄆今真定府趙州高
邑縣幽治薊今北京楊治歷陽今和州荆治漢壽今常
德府武陵縣益治雒今成都府之漢州交治廣信今梧
州關中復置雍州後罷興平元年分涼州河西四郡為
雍州是為十四州三國魏州十二蜀置益梁二州吳置

交廣荆郢揚五州晉平吳凡十九州南北僑立自侈而
已隋改州為郡凡郡一百九十唐改郡為州太守為刺
史分十道凡州府三百一十五而羈縻之州蓋八百二
十四都督開元二十一年分十五道置採訪曰京畿治
西京城內曰都畿治東都今河南曰關內多以京官遙
領曰河南治汴今開封府曰河東治蒲今蒲州曰河北
治魏州今大名府曰隴右治鄯州今西寧衛曰山南東
治襄陽曰山南西治興元今漢中曰劍南治成都曰淮

南治揚州曰江南東治蘇州曰江南西治洪州今南昌
曰黔中治黔州曰嶺南治廣州置十節度嶺南五府經
略此外長樂經略東萊東牟兩守捉宋二十三路至道
三年定十五路咸平四年分川峽為四益梓利夔天聖
分江南為二康定二年分陝為四秦鳳涇原環慶鄜延
慶歷四年分河北為四定州高陽真定大名皇祐三年
分淮南為二楊廬熙寧五年分京西為南北陝西又為
六路八年分河北為東西共二十三路元以各州為路

分為行省今時仍省名改為府雲麓漫抄言漢刺史無
所處之地以戴叔倫撫州廳壁記云居靡定處權不收
人遂確以為無治所此未見通典邪居靡定處言出巡
耳

古都 處義鞏昌府秦州人都陳今陳州宛丘今時陳
州屬開封府陳州見有伏羲廟及陵 神農隨州人都
陳又徙營曲阜春秋稱魯太庭氏之庫 黃帝陝西中
部縣人都涿鹿上谷之涿鹿世本云涿鹿在彭城則上

谷亦名彭城或曰都有熊河南新鄭是也涿州今有涿鹿驛而保定府乃秦之上谷鉅鹿漢之涿郡今保定府有涿鹿山黃帝破蚩尤於此少昊自窮桑登位徙曲阜顓頊自窮桑徙帝丘東郡濮陽是也濮陽故城在今澶州濮陽縣東明朝為開州郡縣志載高陽故城在汴州雍丘縣西南或曰顓頊高陽都杞帝嚳都亳河南偃師是也堯舜禹俱都平陽堯始封唐中山唐縣是也都平陽今臨汾縣舜都蒲坂唐河中今蒲州

屬平陽府平陽府古亦通稱蒲州 禹生石紐都安邑
陝州夏縣漢為安邑屬河東後魏改夏縣此時安邑屬
平陽府之解州隋為虞州禹受封夏伯今河南陽翟也
輿地志言宿州虹縣本夏丘恐非

商都八遷 封商在上洛商是也昭明居砥石遷于商
湯始居亳有三亳二在梁國一在河洛之間穀熟為南
亳即湯都也蒙為北亳即景亳湯所受命也偃師為西
亳即盤庚所徙也宋州穀熟縣即此時歸德府之考城

縣考城今有亳城有大蒙小蒙蒙與穀之亳尚有分邪
本清曰湯遷南亳即歸德府亳一作薄荀子湯以薄管
子曰湯以七十里之亳地理志山陽郡有薄縣注湯都
亳說文亳京兆杜陵亭名則又一亳也呂覽所言之鄆
其始封邑也升菴以鄆即殷字非是詳見襍論仲丁遷
于囂教倉是也今之開封府鄭州滎陽縣秦置教倉於
此河陰縣有敖山河亶甲居相去鄆四十里殷墟南今
輿地記以為大名內黃祖乙遷于耿河東皮氏縣在今

為平陽蒲州之河津縣遷邢即襄國今順德府邢臺縣
所謂龍岡也音耿為邢者索隱之說也盤庚遷亳殷偃
師也通志激水出陽城東至西華汝陽入于潁古人并
謂潁為激詩補傳曰激潁同音今陳州之商水縣也武
乙徙河北居朝歌即漢野王今懷慶府河內縣也或曰
竹書紀年南庚三年遷奄在淮夷北則商凡八都矣

周建都 后稷岐山縣人封邵扶風釐城是也即今鳳
翔府公劉徙豳今西安府邠州也鳳翔府郿縣云是古

邠國有邠城一作甃城釐城駘城見左傳注此古人字
形相通台怡之音亦通也太王邑岐今有岐山縣古岐
周地云在笑陽是武功縣非今之扶風縣也王季宅程
周書作郢詳前下
郢條文王徙郢在京北鄆縣東南武王都
鎬漢鑿昆明池是也周公營洛即今河南府懿王徙伏
丘秦曰廢丘京兆槐里是也今之興平縣厲王居甃通
典晉州霍邑漢甃縣今霍州平王徙洛兩周正義曰王
城及鞏非也桓居河南惠居洛陽詳見前

秦都咸陽 孝公作咸陽自櫟

音樂

陽徙居之關中四塞

舊說引及居庸誤矣櫟陽即萬年縣近朝為臨潼縣

漢都 初居櫟陽馮翊萬年縣今西安府之咸寧臨潼縣也七年都長安即秦咸陽京兆所治縣也光武東陽人入雒陽幸南宮卻非殿遂定都焉

三國 蜀都成都 魏都鄴今彰德府 吳始都于丹陽築京城徙秣陵改為建業黃初徙鄂改武昌後還章浦曰吳都武昌乃武昌縣王伯厚曰庾亮南樓非鄂皆

因舊志注而然也

兩晉南北朝都 晉武都洛為西晉元遷建業為東晉
宋齊梁陳皆因之 北魏猗盧自馬邑為代王什翼犍
更營盛樂珪都雲中徙都平城孝文遷洛陽改元氏雲
中代即大同府盛樂在朔州唐之朔州即馬邑屬定襄
定襄馬邑今皆屬太原縣平城即雲州定襄縣通典曰
即雲州隋雲內常安鎮也地在今府

隋都長安 新建大興城

唐五都 高祖單陰縣人都長安改大興縣復為萬年
縣玄宗幸蜀以成都為南京至德二載以鳳翔為西京
西京為中京上元元年置南都于荊州寶應元年詔曰
五都

五代都 朱晃都汴 後唐莊即位于魏州遷洛 晉
石敬瑭太原即位都洛徙汴 漢劉暉即位于太原都
汴 周郭威都汴

宋四京 西京洛陽開寶八年修洛宮室南京應天府

祥符七年升太祖以歸德軍節度使即位也北京大名府慶歷二年升按晉賜畢萬魏卜偃曰魏大名也為河中之永樂今蒲州也非元城之魏也後漢以大名名此舛矣又閱舊唐書田悅稱魏王以魏州為大名府其失始此

元大都上都 元以燕為大都即京師明初名北平府永樂改順天古為薊城廣陽即金之中都也紹興二十年金主亮徙都之名大興府治薊春秋燕國都碣石前

漢為薊縣舊治燕都有桑乾水慕容儁都此元之上都
則今開平衛在延慶靖胡懷來土木之北一統志云雲
州獨石衛在元之上都城內宣德五年築城又曰即金
桓州地有查河元初建都于和寧即哈刺禾林也有迷
河溫泉老父中丞公邊略曰自以大寧靖難棄為三衛
而宣遼隔矣後又以撫賞失節邊將殺熟丁報級而屬
于建矣天子自守邊而項後古北潮河不二日至安定
門徐中山亦出塞而入取燕者也薊密昌庸重哉

五霸 夏伯昆吾東郡濮陽縣唐武德四年析濮州濮陽置昆吾縣今屬開德府智按濮州在東昌府大名府滑縣與開州又屬古濮陽地地相近也今開州境有濮陽城 商伯大彭今徐州 豕韋東郡白馬縣東南有韋城今滑州韋城縣智按亦是滑縣地滑縣有白馬山所謂黎陽津即白馬之津也韋津一作圍津 周伯齊桓初太公都營丘即臨淄胡公徙居薄姑智按今青州博興縣也其應劭所云瑯邪姑幕為古薄姑非是今博

興縣有薄姑城莒州有姑幕城可以較矣獻公復都臨淄 晉文叔虞封唐在絳州翼城縣西子變徙晉水傍穆侯自晉陽徙都絳孝侯改絳為翼一名故絳後為曲沃武公所并又命曰絳景公遷新田又稱新田為絳郝氏曰隱公初年周室東遷鄭莊公始射天子專征伐是伯之始也閔僖之間齊繼之晉文繼之成襄以來楚繼之昭定以來吳繼之此說是

十二諸侯 魯都曲阜祥符改為仙源 齊晉秦俱見前

楚見後

宋都商丘宋更名曰睢陽正義曰今宋州宋

城縣也今為歸德府

衛都朝歌即汲郡今衛輝府淇

縣伯厚云朝歌故城在衛州衛縣西二十二里衛縣今

省入濬州黎陽戴公廬於曹即滑州白馬是也齊桓城

楚丘而居文公焉今開州境成公遷濮陽元君徙野王

今懷慶府河內縣

陳都宛丘今陳州治漢潁川地也

蔡本畿內地采邑蔡仲改封汝南平侯徙新蔡昭侯徙

州來以州來為下蔡汝南為上蔡今壽春縣智按潁州

潁上縣梁名下蔡壽州之鄉有下蔡乃漢縣也今有下
蔡鎮 曹都曹今定陶縣 鄭桓公友初封鄭故城在
華州鄭縣西北三里武公取虢鄆十邑之地居之即鄭
州新鄭縣今時為開封府禹州新鄭縣禹州秦陽翟地
新鄭故鄆國鄭州滎陽古東虢國即秦置敖倉之滎陽
也 燕後見 吳都吳正義曰太伯居梅里今無錫至十
九世壽夢居之都勾吳諸樊徙吳至光使子齊築閭閻
城今蘇州也 越都會稽今紹興

六國 趙自晉獻賜趙夙耿注今河中龍門縣東南後
名為蒲州趙襄居原今屬孟縣簡子居晉陽獻侯治中
牟索隱曰在河北非鄭之中年敬侯元年始都邯鄲即
磁州縣智按磁州今屬彰德府而廣平府邯鄲縣正古
趙都蓋地近今分屬兩省耳 魏自晉獻封畢萬魏城
在陝州芮城縣五里漢河北縣輿地廣記河中府永樂
縣古魏國智按平陽府平陸縣是漢河北縣地而芮城
縣正與平陸接壤河中即蒲州古今分屬異耳悼子徙

治霍今平陽府霍州魏絳徙安邑即禹都惠王三十一
年徙大梁今開封 韓武子封於韓原今韓城縣宣子
徙居懷州武德縣今為河內縣貞子徙平陽哀侯滅鄭
徙都鄭今新鄭縣戰國策謂韓惠王曰鄭惠 齊田和
都臨淄即太公之營丘齊詩曰子之營兮 楚熊繹當
周成王時封居丹陽徐廣曰在南郡枝江括地志歸州
巴東縣東南四里南郡今荊州府也文王都郢今荊州
括地志在江陵縣東北六里昭王徙都即襄州樂鄉縣

後省入宜城今襄陽府楚復還郢襄王時秦拔郢保於
陳城今陳州考烈王徙壽春命曰郢 燕武王封召公
於燕都薊太史公世家以姑姓之燕仲父伐周惠王者
為北燕誤矣括地志燕山在幽州漁陽縣東南六十里
今薊州也即此時京城

西漢末諸國 赤眉樊崇立盆子於長安 彭寵據漁
陽 王郎帝邯鄲 劉永據睢陽 盧芳據安定今平
涼涇州 隗囂據天水今秦州 秦豐據黎丘今襄陽

宜城縣黎丘城 張步據臨淄 董憲據東海今海州

李憲據廬江今廬州 公孫述據成都變曰外有鍾武侯劉望起汝南龐萌稱東平王與董憲連述將延岑據汝寧田戎據翼江

晉十六國 晉載記劉淵以惠帝永興元年據離石即石州智按即汾州府永寧州寧鄉縣臨縣俱離石地也稱漢都蒲子今隰州稱帝徙平陽劉曜徙長安號趙李雄以永興元年稱帝都成都號成壽改為漢 後九

年石勒據襄國今順德府邢臺縣謂後趙石虎據鄴

張軌先據河西姑臧即涼州今鎮番地是歲石勒後三

十六年也重華自稱涼王據敦煌即沙州曰前涼近時

猶有沙州衛已棄敦煌畫嘉峪關為界後一年冉閔

據鄴稱魏後一年苻堅據長安稱秦慕容廆居棘

城棘城在營州城東南一百七十里稱燕是歲苻堅後

一年也僞始僭號蓋璽以咸康三年即燕王位築龍城

改柳城為龍城縣七年都之號新宮曰和龍通典營州

柳城縣有和龍城通志即大遼之黃龍府也田疇引魏
武上徐無山出盧龍口越白檀之險歷平岡登白狼堆
至柳城勝烏丸是也後三十年後燕慕容垂據鄴都
中山春秋白狄古鮮虞地漢盧奴縣其新樂縣漢新市
縣秦趙郡鉅鹿二郡地高帝置常山中山即今真定府
定州後秦姚萇據長安後二年西燕慕容冲據阿
房是歲乞伏國仁據枹罕今河州稱秦通典曰都苑
川在蘭州五泉縣後曰子城縣北史築勇士城都之乾

歸遷金城近時設蘭州衛於金城乞伏是曰西秦 後
一年慕容永據上黨稱帝於長子 是歲呂光據姑臧
稱涼謂之後涼近時於姑臧地置鎮番衛 後十二年
慕容德據滑臺今滑縣稱南燕都廣固曹嶷所築乃青
州益都縣西四里晉志苻朗以州降以辟閭彬為刺史
為德所滅玄文說劉裕曰石虎塞五龍口而曹嶷降慕
容恪又塞之而段龕降裕又塞之而超擒通志宋青州
治廣固則正今之府治也今廣興記并不載廣固之名

而蘇刻通鑑卷首國都且以廣固為陝西成固縣矣

是歲禿髮烏孤據廉川今秦州上邽縣西南隆安元年
稱西平王曰南涼烏孤更稱武成王後三歲徙於樂都
通典鄯州湟水縣一名樂都又云烏孤都廣武張駿置
廣武郡蘭州廣武縣也唐更名金城縣明乃設蘭州衛
於金城 段業據張掖稱北涼明朝設甘州五衛於張
掖地 後三年李嵩據敦煌稱西涼遷酒泉此時為肅
州衛 後一年沮渠蒙遜殺段業都張掖遷姑臧總謂

北涼 後四年譙縱據蜀稱成都王 後二年赫連勃勃據朔方都統萬稱大夏今寧夏 後二年馮跋據和龍稱北燕為戰國者一百三十六載和龍即柳城姚文變曰冉閔慕容冲譙縱年數短促不在十六國之數

隋末諸國 鄭王世充據東都即河南府 魏李密據鞏在河南府屬縣 梁蕭銑據江陵 夏竇建德據樂壽即瀛州縣今河間遷洺州今廣平 燕高開道據漁陽 梁梁師都據朔方即寧夏 涼李軌據武威 秦

薛舉據金城即蘭州 永樂李子和據榆林 定楊劉

武周據馬邑為定楊可汗 漢東劉黑闥據洺州 吳

李子通據江都 吳杜伏威據歷陽即和州 梁沈法

興起吳興今安吉州 宋輔公祐據丹陽即陳故宮都

之今鎮江府 楚朱粲據南陽今鄧州 元興操師乞

據豫章 楚士林弘據虔州今贛州 魯徐圓朗據充

州變曰其時宇文化及據江都稱許楊士林據武昌稱

楚汪華據歙稱吳王須拔據上谷稱燕羅藝據涿稱燕

劉季真據離石今汾州屬縣地稱劉王邵江海稱新平王俱在十三年內

後五代十國 吳楊行密都廣陵 唐李昇後稱江南都金陵遷豫章復都金陵 前蜀王建成都 後蜀孟知祥 吳越錢鏐錢塘 閩王審知福州 漢劉隱廣州 楚馬殷潭州今長沙 荆南高季興南平即江陵 北漢劉旻五代史曰東漢太原 後王延政以建州稱殷即閩也以梁初論之天下為十一國劉道原曾作

十國紀年或曰西岐李茂貞李從暉北燕劉仁恭劉守
光晉李克用楚之後復分武陵周行逢雖皆稱王帝不
列十國之數

地輿釋地

地重言其地貴重也 貨殖傳汧雍地重重為邪索隱
曰地重言重於耕稼也陳明卿曰非也蓋言土厚耳智
謂言關中之地近天子多公卿富厚貴重也下文秦文
孝繆居雍隙隴蜀之貨物而多賈舊以隙為句非也當

以隙屬下為句言開隙於隴蜀之間也

立泉瀑布也亦謂之泄 莊子縣水三十仞班固終南山賦傍吐飛瀨上挺修林立泉落落密陽沈沈韓愈詩縣瀑垂天紳孟郊詩簷溜擲天紳蘇軾詩餘波猶足挂天紳縣水立泉天紳皆指瀑布浙江合浦陽江逕諸暨與洩溪合有三洩陸游會稽志言諸暨泄溪造雲壁立上洩高二百餘丈土人號瀑為泄爾輿地志作五泄溪水經注言縣河雷汧瀨注潏溢散氛霧合樊宗師絳守

園地記言水腔瀑三丈洄漣皆狀瀑語

夷庚平路一曰往來要道也 左傳以塞夷庚繁欽辨

惑吳人以舟楫為輿馬巨海為夷庚陸機辨亡旋皇輿
于夷庚詩序曰由庚萬物得由其道是以庚為道也

趵突即瀑流也 張邦基曰濟南為郡在歷山之陰水

泉清冷凡三十餘所舜泉瀑流金線真珠洗鉢孝感玉

環之類皆奇李格非

字文叔

嘗為歷下水記敘述甚詳曾

子固作詩以瀑流為趵突未知孰是今濟南府志則載

趵突泉矣此爾雅之瀆大出尾下也疏曰汾陰有水口如車輪曰瀆魁又馮翊郃陽有一瀆夾河又一瀆皆潛通郃陽今同州西陽雜俎有大極泉蓋神瀆盎漿之類列子所云甌甑有水曰滋穴神瀆也升菴言蜀有七瀆盆溢瀆起也陳忠諫伯崇往來甘陵疏曰隔并屢臻海水盆溢注盆與溢去聲同溝洫志曰河水溢溢蓋滿起貌晉志水滂甌溢此因盆用甌耳相如盆入曾宮之差我唐儒學傳全集京師莊子隱全皆謂滿起也溢又作

噍當與瀟歛通

水疾崖傾曰礧灘礧相湊曰𣶒 升菴曰四川有閬王
礧燕子礧水疾崖傾曰礧灘礧相湊曰𣶒𣶒音子今有
石危子折危子又云大小巫湖曰二巫外智裏智曰兩
智按𣶒乃孫氏妄立之音不必以此文蜀之鄉語子也
撫謙敬甫皆以𣶒為古流字子才以𣶒為古委字

水溪瀨中謂之究 竺枝扶南記山溪瀨中謂之究水
經注曰九真郡九德浦逕越裳究九德究南陵究進得

橫山度比景廟橫山即今南寧府之橫州也

合口水決謂之渙漭渚者謂之洪 衡漳會雩池謂之合口又分二川當其水決處名之曰李聰渙曰洪者如雞翹洪呂梁洪之類是也

水合闊溢謂之澹 樂成陵縣北衡漳逕弓高縣合柏梁澹如沔北有下澹戍皆岐水合若杜工部用澹澹則自以意用也又作汙地名雁汙韓文曹成王碑行趾川汙遼有三岔

即汙又去聲

河嘉靖雷禮修盧溝河令岔河水

歸故道

淀浸之滹涘淺水也 音殿魏都賦掘鯉之淀注在河
間如淵而淺也今北方傍水草之地皆謂之淀倪鴻寶
領司徒曾議諸淀欲堤之以為屯田水經注范陽城西
易水鹽亭陂通梁門淀又清淀水發西淀轉注略史記
洩河淳水放之海前西域傳其水亭居考工記奠水皆
一字則即淀字矣淳淀之音莫猶廷轉音定又轉為殿
也

湖淀之波漾者曰澱 水經注易水又東渥水注之謂
之大渥澱小渥澱又渥水會博水逕陽城縣散為澤渚
為疊舸折芟之所曰陽城澱蓋昌有濩澱今松江府有
薛澱湖

塵垢或作塚均塏塏通作蓬塊其曰跋跌言塵墊也
存中曰博物志曰徐州人謂塵土為蓬塊吳人謂之跋
跌韻輯轉注曰莊子塵垢崔本作塚垢塚音塏齊謂風
塵曰塏塏宋玉用塏塏亦塵塊也九懷曰靈土忽兮塵

塵音枚集韻作埤古詩云跣跣紅塵下則馬踐塵起也
博雅注室塵即煙煤呂覽煤室入甑中注煤室烟塵之
煤也

鬱棲糞壤也董塊粘土也 至樂篇陵鳥得鬱棲則為
烏足宋碧虛子陳景元注曰鬱棲糞壤也烏足俗呼墨
草烏髭方用之劉守光圍滄州城城中食董塊董塊粘
土也

埠頭水韻也

說文韻從步故水邊亦謂之步青箱襍

記曰退之羅池碑言步有新船或以步為涉非也智按
任昉曰上虞有石駝步吳江中有魚步龜步湘中有靈
妃步昉按吳楚間謂浦為步則非特唐有此音矣後人
遂作埠音步北方曰務如宋趙彥衛雲麓漫抄東京至女
真御寨行程有薊州永濟務遼河梁虞務今通州有河
西務東昌府有李開務元至正六年盜扼李開務閘河
今積販泊商之所曰埠頭刻日交市北方曰集南方曰
墟

水畔曰汧猶滹也 廣韻有汧音畔唐書王維傳有笑

蓉汧片為水之半故得音

京古原字 檀弓晉獻文子曰武也全要領以從先夫子於九京也智按古京字篆作京周禮籒師大篆也爾雅高平曰原通用則九原猶九地也漢九原郡改五原絳州九原山如洛北邙晉都絳故文子觀而歎之俗不知京為古原凡用兩京書作兩京及用九原書作九京矣直翁反云檀弓誤胡元瑞筆叢猶用九京以從無人

言及耳原又與阮通見後

江膺猶言江心也 水經注曰若水至贛道縣又謂曰馬湖江繩水瀘水孫水淹水大渡水皆合焉縣人隗叔通為母汲江膺水天為出平石至江膺中今謂之孝子石應璩引此以為江裔水

竅塞外道也 陸贄關中事狀倘有賊臣蹈竅注音萃塞外道也此字別無所本敬輿條奏何為用奇字必當時語也古文尚書作竅三苗說文竅塞也虞書曰竅三

苗粗最切則是竈字亦音萃乎說文穴部復有竈字七
亂切此何解乎蓋因俗文而附入之耳

瀧灘也 嶺南急流謂之瀧韶州樂昌有瀧水音霜歐
陽公有瀧阡嚴陵七里灘亦曰瀧葉少蘊曰土人謂瀧
為籠初至為入瀧既盡為出瀧

大湊為四方所輻輳也則土言法也 作雒篇第四十
八周公俘殷獻民遷于九里俾康叔宇于殷俾中旄父
宇于東乃作大邑成周于土中城方千七百二十丈郭

方七百里南繫于洛水北因于邠山以為天下之大湊
制郊甸方六百里周西土為方千里分以百縣縣有四
郡設丘兆建大社于國中其墳東青土南赤西白北驪
中央黃將建諸侯鑿取其方一面之土包以黃土苴以
白茅以為土封故曰受則土于周室乃立五宮大廟宗
宮考宮路寢明堂咸有四阿反坫重亢重郎常累復格
藻枕設移旅楹燹常畫內階文階堤唐山廡應門庫臺
元閭

水拖猶堰也 晉太元九年謝玄於呂梁遣督護聞人
顛用功九萬擁水立七拖以利運漕水經注泗水之上
有石梁今名呂梁洪在徐州彭城東五十七里宋景公
彎弧東射矢集彭城之東飲羽于石梁陳吳明徹以舟
師北破下邳進屯呂梁堰泗水灌徐州是也

石的石壁之最著者也 水經注滎陽陽城鄉李勝祠
廟前有石蹠蹠上有石的箋云石的疑作石碣非也智
謂石的乃謂壁立著明如射侯之的也會稽記有射的

山山有石壁方二丈

滯注淺水也 水經注斥漳縣水入青洹故瀆水舊斷
溪東北出涓流滯注而已玉篇曰滯莫歷切水也

琴城冢也 水經注楚人謂冢為琴六安縣都陂中有
大冢民曰公琴即臯陶冢也 鮑陽縣有葛陵城有楚武
王冢民謂之瑟城箋曰瑟當作琴

鹽鹵澤也 水經注膠水北歷土山山悉鹽坑箋云
坑當作鹵按玉篇音亢云鹽澤也北史楊義臣以遼東

還兵入豆子甌討賊譌作甌省作圻耳存中言堯梢水乃解澤之濁水敗鹽者也

町疇田間道也毛萇因町疇鹿場則訓町疇為鹿跡

許慎亦曰町疇禽獸所踐處可謂泥矣町田間道曰町疇蓋言其蕩蕩也左傳町原防井衍沃于寶注平川可井者井之原阜不可井者則町之町小頃也張衡賦編町成筐注謂畎畝莊子舜舉于童土之地注重土疇也如山無草木曰童伊川曰廬旁隴畦也征夫久不歸町

曠之地踐為鹿場非謂町曠即鹿場也集韻作埵暖黠
公紹依說文曠土短切今山東方言以路平行便為町
曠讀如汀湯江北則呼為汀湯白子皮為余言之

解果猶蟹螺也蝥慄言狹而果也 升菴以解果蝥慄
蟹螺為一引荀子解果其冠魏都賦風俗以蝥慄為嫗
說苑淳于髡言祠田蟹螺者宜禾污邪者百車蟹螺高
地也今作偃僂智按今作甌窶史記甌窶注猶培塿也
左傳部婁無松柏荀子注引說苑蟹螺宜禾言蟹螺之

背微高韻補引史記注裴側之地猶培側也以培塿言
冠言冠之狀中高而旁脰耳則解果當言蟹裸若左思
之用蟹裸為媼智見媼一作媼蟹又作儻狹也儻猶揚
雄質媼之媼隘也唐韻有裸蒼頡篇果敢作裸敢則左
思之用蟹裸蓋言風俗以隘狹果敢為快也媼古音壞
與快近也音義全與解果蟹螺不同劉子玄史通曰蒼
梧人風媼劃地年歆瘡正用蟹裸為媼而作媼劃唐人
好造如此

沈澤猶沈斥也漆泚正言菜洲沮洳也 陳無功引傳

曰沈者莽也沈澤言澤無水如斥鹵之類也智見風俗
通山澤篇有沈有沛升菴引之猶漢書言沈斥也又按
公紹列二沛引一為地名一為水草王制沮澤注沮謂
菜沛草所生曰菜水所生曰沛公羊傳草棘曰沛崔駰
達旨蟲蛇之趣大沛子謙合之說文本無二沛但作泚
普蓋切而又有漆泚之訓玉篇波兒箋曰泚從艸省

山脅今之衝坂也 說文坡者曰坂一曰澤漳一曰山

脅韓信並山謂傍山脅也今山衝小坂是也

朝夕池海名言潮汐也枚乘傳朝夕池潮有朝夕之期山海經朝夕池一名天池風俗通海為百谷王亦曰朝夕池水經注平樂縣南有朝夕塘一日再增再減同於潮汐詳質測

尾閭歸墟也荀子渤海東有大壑其下無底名曰歸墟八紘九野之水天漢之流莫不注之而無增無減一名歸塘即莊子所謂尾閭者也智曰地中多竅水吸則

物隨之弱水不載必下有氣吸收黃河乍清或水物吸收耳總歸氣論各海氣歸各處之峰頂此何疑乎

土有立土橫土土穴謂之窻戶 說文窻武永切北地謂地空又曰北方謂土穴為窻戶陳後山曰潁中田理有立土不可稻何子元言山陝間穴居亦言有立有橫橫土可居又言有土界水界之說唐僧泓告張說土界水界有龍守之宜鑄鐵牛以防二龍又宜埋玉埋硫此說雖不可知而葬家從未言及或曰玉之能和百神固

未可知而疏性則可辟蟲蟻絕水脈

容突即凹凸坳垤 終南太乙云容突出蒼頡篇新都
曰即凹凸陳懋仁曰經史直音容音渴合也突音亦穴
也智謂字書臆解支遁云地有坳垤周伯溫取坳垤反
以凹凸古字為俗神異經大荒石湖無凹凸畫記一乘
寺名凹凸寺

魁父猶塊附也 周語高山廣川大藪幽王蕩以為魁
陵糞土溝瀆京山曰魁陵即丘陵趙簡子夢帝謂羸將

大敗于范魁之西范魁即范丘又言列子魁父即丘阜
梁父即梁阜智按列子曰以子之力不能損魁父之丘
魁丘並用自非可通謂為塊附之丘猶可蓋培塿一作
附婁魁然即塊然曰不注曰不其謂如花專故培阨有
丕音夫音與不字可音否又可音夫正同

寫田遠莊寄業也駱田架田即葑田也 王伯淮奏議

曰交鄉寫佃謝華啓秀以封水煥山對之煥山見南宋
西陽王子尚奏煥音戲在末韻即徐文長所謂煥爐謂

藉乃也見農時條說文寫寫窅深也多嘯切子謙遺之
今方言即以隔遠為寫遠新都又言對田音去聲元瑞
駁之據閩閩十三州志云百粵有駱田王氏農書架田
即對田駱亦音架交趾有架田此何能駁邪元美言吳
有門曰對廣湖邊田今呼為對江賦所指即此

句廉岸曲之稜也 趙充國傳辛武賢擊罕羌入鮮水
北句廉上服虔句音鉤師古曰句廉謂水岸曲有廉稜
也韻會引說文廉仄也徐曰廉稜也今說文不載徐說

而徐解正合按喪大記即位于堂廉楹鄉飲酒設席于堂廉東上注皆謂側邊廉稜也稜即廉之轉聲而閉口也屋稜曰檐斤稜曰廔壁危曰阼皆廉稜之聲

息壤塗土也 鯀竊帝之息壤以堙鴻水羅泌路史云息生之土長而不窮漢時臨滁地涌六里又無鹽危山土起唐江陵南門地隆起如伏牛馬去之輒復又柳子所言永州龍興寺地如負甕起皆為息壤莊子隱塗亦謂奔起也顧遜園曰王襄敏公廳事有土墳起古息壤

也智以息壤是理竊帝者奇其字法耳萊蕪之石自立


漢昭帝時資州之石上坡獨異記寶曆元年臨平之湖自開錢塘記吳時

歷陽由拳自陷歷陽陷見辨命論由拳陷見神異傳何獨於息壤而疑之

詳見質測

九有猶九圍也 外記曰人皇居中州以制八輔此引

春秋命歷叙文也古稱九有有與圓通都為中圓八輔則餘八圍也故本清以八索為八澤舊說八索八卦也



通雅卷十七

欽定四庫全書

子部
通雅卷十八

詳校官中書臣朱文翰

員外郎臣牛稔文覆勘

總校官降調編修臣倉聖脉

校對官中書臣高中

謄錄監生臣錢黃照

欽定四庫全書

通雅卷十八

明方以智撰

身體

鼻祖先生任督消息之自也 胚具命門生鼻隧為小
環而漸長成形即為任督二脈之宗隧脈生脾肝肺心
生其勝已者心生小腸大腸膽胃膀胱三焦生其已勝
者謂之鼻祖言氣息也將寐則目不用已而耳不用鼻
息則寤寐一如耳目橫而鼻中直鼻從自昇聲篆𠂔即

鼻天畀也以二孔相代錯生息而消息也自心之篇也
膻音亶信也任任其下督督其上

焦泌三焦泌汁于三隧也營衛歸宗而呼吸晝夜為脈
會人身之天地也受天地之中以生中未易言姑以
身而物之頂圓額孩音方天地定位也鼻岳口開山澤通
氣也眼外耀而舌下津水火不相射也喉出響而耳收
聲雷風相薄也臟腑應運氣十二經應時半舉之六爻
也骨節三百六十五周天也宗氣搏而積於膻中行上

焦呼吸為一隧中焦音必水穀之精氣注肺應刻數化
血榮四末行經脈中曰榮隧行分肉之間下焦別迴腸
濟泌滲膀胱曰衛隧太陰肺主內太陽膀胱主外而平旦會
於寸口子午用卯酉帝出夏時非其徵邪任督叶之晝
夜五十營行八百一十丈為萬三千五百息石齋先生
疑與易策異智嘗窮之蓋洛書之數也六十四日大周
為八十六萬四千息而具策會矣

五倉五藏也六腑納輸而臟本藏也 谷永諫成帝化

色五倉之術左道欺罔李奇曰思身中有五色五倉神則不飢不死今醫言倒倉其遺也子雲夢五藏墮地內經脾為孤藏竊文志五藏六府後加草肉作臟臟陰通於氣喉腑陽通於食咽人身惟此二道

魂魄亦稱營魄精神氣化也 老子載營魄抱一京山曰即魂魄焦氏翼訓營為魂太玄告魂魂萬物動而營冲智按古讀魂為云以韻解義故曰魂營營也孝經說魂芸也白虎通魂者沍也又按薛君章句聊樂我員作

魂則魂音云明矣鬱儀作魂魄晶神鄭作請神請由情
生神申于天易曰精氣為物游魂為變祭義曰神者氣
之盛也魄者鬼之盛也子產曰既生魄陽曰魂書曰徂
魂升落魄降關尹曰精神水火也精無人神無我神動
名意意動名魂凡造化所妙皆吾魂所有皆吾魄醫言
腎藏精為命心藏神為性子瞻曰志勝氣為魂氣勝志
為魄黃勉齋曰精之神曰魄氣之神曰魂愚者曰氣古
氣字氣乃餽也因氣化而形化聖人重在理化理與心

來知則能用心之精神是謂聖泯則本泯也心之精必
親已而疎物心之神必用外以為內精神皆氣也精凝
氣而神神則統精氣性命一陰陽也然有轉陰陽傳精
神盡性命者可茫然邪聖人合内外形神虛實而明其
中之理故善用其神化不則且為精神性命陰陽所惑
戴干豐上也 面額高滿曰戴干乾鑿度云泰表戴干
鄭氏注云表者人形干盾也隋書王劭言上有龍顏戴
干之表禪師有豐干因貌以為號仲任言額頊戴干恐

是戴干之訛然子才昭明敬甫皆謂古午作午或取此邪

大宅面王也 內經言面王面部也黃庭經曰靈宅既清玉帝遊梁丘子注曰面為靈宅一名大宅大洞經曰面為尺宅或作赤澤七發曰滿于大宅泰之揣枚乘在漢已見道書而李善等不詳所出

輔銘言輔頰與顙也 爾雅目上為名猗嗟名兮注曰為可名也支矣升菴云玉篇引此句作顙眉目之間也

智按大玄輔銘滅麋言陷及頰顙以沒眉猶易涉滅頂也西京賦眇藐流眇注眇眉睫之間也不知引爾雅目上為名郝氏亦未收西京之眇滅麋即滅眉古通也荀子須麋即須眉孟康曰眉上為衡陳崇奏莽功德曰盱衡振色續博物志曰楊雄謂揚眉曰楊衡梓師注仲師曰衡麋衡也即謂眉衡今謂眉顙面目曰麋

武敏拇文也詩履帝武敏爾雅注拇迹也武與無曼莫毛通轉而岷汶砥碣通用故知武為拇敏為文蓋謂

足拇之迹文也禮布武謂步也詔侑武方即無方呂覽
出桴瓦缶武梁從之謂眊噪也可推古之聲通

腹尺言腹肥也 三國志趙稚長有腹尺故正平笑之
後人或稱腹負因東坡腹負將軍語或云是黨進

柏耳迫耳也 北史許公宇文述素好著奇雲定興曰
入內耳冷乃製挾頭巾令深柏耳人學之名為許公柏
勢按柏與迫通瓠子歌柏冬日漢高曰柏人者迫於人
也

八彩謂八眉其跳踑跳也參漏滲漏也伉脇即駢脇末
僂謂背僂也尚書大傳曰堯八眉舜四瞳子禹其跳
湯扁文王四乳八者如八字也其跳者踑也扁者枯也
淮南言禹耳參漏謂滲漏今之漏耳論衡遂曰三漏荀
子言仲尼蒙俱如蒙魃頭也傳說如植鰭言乾瘦也論
衡言重耳張儀伉脇周公背僂臯陶馬口孔子反羽謂
反脅也莊子曰老萊子之弟遇仲尼曰修上而趨下末
僂而後耳末僂謂背在後為末也史記注言老子耳有

三門謂耳門三曲也管子曰子產曰角晏平仲月角尾
生犀角柳下惠更魚反角角者額也日言滿月言闕犀
謂直骨隱起犀角在中也反謂拗骨也方言倚畸奇也體
不具謂之畸傳曰畸閭而語淮南曰男女切畸皆奇足邪
倚管子必有管屬趾畸猶今之言踣也後人用箕踞即
其跳之畸也古作甘即箕字借為語詞舊注其跳之其
為助語者非

差肩猶比肩也肩迫猶駕肩也

阮籍莊論曰闕鑑整

飭推年躡踵差肩而坐猶豫相林差肩言駢集層次相
林猶言相視如林此嗣宗字法也田儼傳併肩而事主
師古曰併音步鼎反嚴大子哀時命曰衆比周以肩迫
今蕪城賦言駕肩狀濟濟也肩迫則猶有競進之意

曾撓猶曾波也 招魂曰娛光眇視目曾波些曾量也
摹寫娛笑輕眇回波層折之態已極致矣大招用曾頗
注南修務訓流眇曾撓正謂眇視若笑也

肺腑或作柿附肺附肺附 史記武安傳蚡以肺

附為京師相注如肺肝相附著年表諸侯子弟若肺腑
注作柿附如札柿之附木太玄親首肺附乾餼注肺削
也柿附木如肺附肝中山王靖傳得蒙肺附劉向封事
臣幸託肺腑又後漢盧芳傳以肺腑之故赦臣芳罪按
當以肺附為正諸借音或形近而通用注者不知源流
各為曲說說文肺金藏也芳吠切皇食所遺也从肉仕
聲易曰噬乾金阻史切揚雄說金作肺楷別之作肺故
形近肺而亂也腐爛也扶雨切藏府作臟腑則肉在旁

在下何別乎故作肘國策汗明曰尾湛肘漬是也

禿褐謂禿髻也 明堂位注齊人謂無髮為禿褐丁度
作禿髻亦作髻博雅廣韻作禿髻音丘入切梓人顧注
鄭司農云讀如髻頭之髻疏曰今以無髮為髻田蚡曰
共一禿翁

足以大指為將手以中指為將小指為季指漢以食指
為噍鹽指 闔廬傷將指注足大指也宣四年注疏五
指巨指食指將指無名指小指定十四年注則明手以

中指為將矣儀禮少牢饋食禮詩懷之掛于季指注詩
猶承也季猶小也服虔曰食指俗所謂噍鹽指也故知
是漢語康成注儀禮飯大擘指本也姚文燮曰唐皇甫
松以蹲鴟釣戟玉柱潛虬奇兵為五指名

欲穴自戀其軀也淮南子原道訓曰欲穴之心亡于

中則饑虎可尾注穴古肉字太玄數五五為土為食為
穴古樂苑載吳越春秋古孝子彈歌曰斷竹續竹飛土
逐穴但從穴從六或古籀之形訛邪諸書不收惟孫愐

收之以為俗作穴顏元孫亦曰穴俗肉字推論寅从穴當古有肉字訛為穴

眇中俠季脅兩旁虛與處也 素問曰冬脈不及令人

眇中清王冰注云眇在季脇下俠脇兩旁虛軟處腎外當眇今唐韻韻會字彙日月燈皆遺眇字當音渺

撓臍言屈體也 荀子曰屈要撓臍古獲切郝後曲節

中也王冰曰肘郝後肉如塊謂之臍後人因謂臍即臍非也臍渠隕切素問曰脫肉破臍或曰腹中胎也智謂

脰當音肫謂腹中之積聚成形塊膜也

媯妍言憔悴而妍也 李夫人傳媯妍注瘦曰媯冥媯音憔悴言以瘦而美也

頤頤折頤頤即頤也 子雲解嘲言蔡澤頤頤折頤說文頤低頭也

唐舉注頤頤之貌又曰蔡澤頤頤折頤說文頤低頭也五感切左傳迎于門者頤之而已頤頤也頤頤也噉頤也頤面黃也戶感切按頤是班超燕頤楚詞頤頤之頤而今左傳作頤之何與頤混集韻又作脰脰若諸字為

重文何故又互訓邪必後人各附矣孫愔領又音欽或作領周燮傳用欽頤廢頤亦此音直書也則領與頤訛邪抑侵覃通邪鄺氏謂噤吟即領頤之訛初學記蔡澤欽頤乃欽之訛

眈耳即儋耳 淮南曰眈耳在其北方注耳垂肩上漢南海有儋耳郡注作瞻大耳說文𠂔曼無輪廓曰𠂔老𠂔以此名子長疑太史儋即老𠂔則儋瞻𠂔一字今儋州即儋耳好戴梭帽如大笠其屠蘇障日覆兩耳之意

乎淮南在北方或訛舉或同名乎互詳方域離耳

匾匾感髑髑鼻莖也

蔡澤鼻鼻顰顏感髑膝攣即孟

子之感頤也髑又作顙烏曷切法華經鼻不匾匾謂感也周變傳澤斂頤感頤注頤鼻莖也

髻髻本作結括髮髻本於婀娜逋髮言蓬首也

髮髻

上鄔果切下吐火切髻髻鬆慢貌髻髻髻皆後人所加古但作結括說文有髻士冠禮曰將冠者采衣紒注曰古文為結髻音計括括或通作會莊子會撮指天是也

髭亦作髭髻本為髮隋記曰子生三月之末剪髮為髻
男角女羈否則男左女右鄭氏曰夾凶曰角午逢曰羈
李陽冰本曰墮也隋削肉也蓋因夾凶之髮為角偏存
為羈詩髭彼兩髦注象幼時髻親沒不髦古有猗儻阿
那之語因有婀娜髻髻列子有擇婁媚者左克明樂府
讀曲歌逋髮不可料逋髮髮散亂也首如飛蓬託怨之
詞也頭如蓬葆則苦狀矣孫壽作墮馬髻後人因為拋
墮宋元嘉時作飛天紆始自東府近世作蓬頭即飛天

之意古讀結如髻李陵椎結注音髻又謂之紐小顏注
急就曰紐謂結之髻也髻即髻字

踳跽即徒跽 說文跽音天寒足跽也 鄭氏以徒跽音
勾跳也 史張儀曰虎賁之士踳跽科頭裴駘曰跳躍也
投石超距亦跳越也 集韻曰偏跽一足曰踳跽或作踳
超或謂是筋斗 智按是拍張喚拳之飛腳縣腿也 疑耀
據孫吾與韻會以筋斗當作跟頭

眇眇目蔑也 師古曰眇謂眇眇目之蔽垢也 眇目皆

傷赤也黃氏曰眇目汁凝也眇充支切觀音兜叢本叢
與昧通宋玉風賦得目為蔑廣韻作瞋易緯作病叢急
就亦作叢古作𦵏

露骨曰骼肉腐曰𦵏 說文禽獸之骨曰骼古覈切烏
獸殘骨曰𦵏𦵏可惡也明堂月令曰掩骼薶𦵏資四切
或作𦵏今文作埋皆非專指禽獸骨也釋文以露骨有
肉分之呂覽作𦵏周禮庶氏注作殞集韻作殍聖母帖
霄骼鮮妍

[illegible]

王沈

釋時論鼻齶鼻而刺天音寥顏戴埴音寥弔王延壽王
孫賦鼻齶齶以齶齶齒崖崖以齶齶齶音剗齶音吼齶
音吸齶音呬又曰脣齶啣以齶視眊腕脰而眊眊音
麻被音披現音現閤口貌初學記齶作齶腕音腕脰宜
作脰音安眊音寬眊音陽如此等字他無所見恐文考
亦未免齶釘耳按齶鼻齶氣也欲與齶通齶齶即齶齶
世說許噪於丞相帳台臺大齶由相如伯儼不前之語

陸法言黠黠噓噓之字思之則哈臺固晉人常語也鼠璞曰衛恒鮒鮒王沈鰲臯成公綏勞曹今之嘗談古人已用之可知此類皆當時之方言也

顙首猶言頭面淨好也說文顙好貌說引詩顙首疾正切箋曰樂工類倡優弄人一日顙俗用淨字或疑是靚字此詩應是逸詩然其意可得而解也或是詩之螭首漢人別本作此字

負牆負宸負劒皆狀其背也禮負劒辟耳詔之注負

謂置之於背劒謂挾之於傍永叔作瀧岡阡表云回顧
乳者劒汝而立於傍升菴方稱其妙智按負古與背通
如周公負展子夏負牆而立胸胸之貌豈謂背上堆牆
乎負劒言負者以手撫童子之肩背若負劒然豈必挾
之如帶劒乎如戟手謂交手也亦將曰帶戟乎

宣髮蒜髮也 升菴曰宣轉第三聲為蒜今少年白髮
曰蒜髮徐文長則謂勞心計算則髮易白曰算髮易與
寡髮古本作宣髮仲師曰頭髮皓落曰宣宣其半白乎

智疑是寡之訛

募俞胸與背也

內經曰治之膽募俞注曰胸腹曰募

背脊曰俞漢書西域傳錢面錢幕幕謂背也倉公傳爪

幕按背穴也

骹骹痿痺也

枚臯傳自詆嫫骹骹曲隨其事是借骹

骹為委被之意也相如大人賦容以骹麗兮文選崔錯

發骹類篇曰骹脛曲也小顏曰骹古委字唐韻骹音靡

戴氏部美切說文骨端骹集也說郭載朱昂續骹骹集

作骯骯誤按晁氏志晦翁從父朱弁作骯骯說骯從凡俗作九六書總要作骯馬援與隗囂將楊廣書姜胥咋舌即謂骯也

淡陰即痰飲 古醫方有淡陰之疾俗作痰飲升菴言初月帖淡悶干嘔即痰悶乾嘔也南齊書豫章王嶷遺命干飯櫛榔

掣縱曰瘕瘕手足掣縱即筋惕肉眴也 瘕尺世切瘕音縱賈長沙用踈盪亦謂掣縱反戾也傷寒彊急角弓

反張掣縱為瘛瘛一作瘛音顛厥掣縱曰瘳小兒多有之漢藝文志有瘳瘳方說文作瘳瘳疾从牙依正韻可瘳瘳感寒健忍之狀也說文曰寒病也孟郊詩瘳毛各瘳瘳又作瘳瘳參上聲瘳所禁切

酸痛猶酸削也脛痠骨酸也周官春時有瘳音消首疾管子曰其泉白青其人終無痛醒說文曰酸痛頭痛鄭玄曰酸削也痛音浴亦酸痛素問曰痿厥腦痛又曰脛痠即酸列子曰心痛體煩類篇曰骨酸也合溪引說文曰

疔音酸瘡也周禮疔瘍注亦謂禿也故史游曰痂疔

漂疽即癰疽 千金方肉中忽生點豆腫泡逐鰕入藏

者死名曰癰疽南人名曰羽著毒通作漂莊子曰漂疽

疔癰與癰音錫同最惡者曰癰疽左傳曰荀偃癰音疽生

瘍於頭素問曰消癰伏熱也又曰癰成消中王冰曰濕

熱也又癰虐但熱當音單

疔瘡傷痕也 諸氏榮美切薛宣傳廷尉引傳曰遇人

不以義而見疔者與瘡人之罪鈞罪不直也說文曰瘡

疔瘡也應劭曰以丈與手毆人剥其皮膚青墨而無瘢

痕律謂之疔瘡

音指毀

類篇曰疔血腫也呂覽齊王疾瘡

趙凡夫曰方書謂之翻瘡又謂之翻胃強以胃作瘡大謬

臚脹謂腹鼓脹也

左傳晉侯將食張即脹也急就曰

寒氣泄注腹臚脹臚音閭脹去聲鼓脹也下文又言癰

疽癰癰痿痺瘰癧顏籀曰瘰四體強急難屈申也瘰似混

脹按碑本作痿疲瘕古庚入陽則瘕可讀故急就下文

病響讓相叶足證說文臚皮也通釋曰今人亦言皮臚
易緯云病臚也

臚臚腫厚也重趼即重繭駢躓即胼胝 蘇弘家曰臚

一作跣一作躓禹稷駢躓素問曰多食酸則肉臚臚

臚皮肉生繭不仁也臚脯也莊子手足胼胝音駢支亦

稱重趼重繭腫癰臚也淮南子包胥曾繭重臚段熲傳

士皆重繭易林曰臚胼為疾又曰臚繭為疾又與此同

則趼繭一聲蓋本用臚繭而後人因作趼音胼又因趼

而通乎轉注略曰趺古人止字漢隸用為足齒字說文引髀脇臣鉉等曰髀胠今別作髀非泥甚

懣讓懣煩悶也讓大便節蘊積而利也 此小顏注史

游語節蘊即所謂五泄之大瘕泄謂後重也倉公傳不得後漉正謂頻澀方言腹滿曰偃注言勑偃也又曰毗顛懣也此是漢人語謂鬱鬱意說文曰心中滿該又曰顛寅于下徐鍇曰顛斥之意顛顛可通毗發語聲故知漢人常語晉書阮孚告溫嶠內迫即謂偃也

皸瘃凍瘡也龜手拘拆也 莊子不龜手注龜音均月

令書引之音斤此附會皸字也趙充國傳將士寒手足
皸瘃从軍音均从豕音築說文曰中寒腫覈文頴曰寒
創也踵亦訓瘃向秀曰龜拘拆也司馬彪曰文拆如龜
文則不必改音矣今或讀皸

慍羝狐腋也 崔令欽教坊記載范漢女亦是竿木家
開元出內有娑媚而微慍羝慍羝謂腋氣今所謂狐臭
也

疾蠱一作族索疾癰疾癰 戴合溪引陸德明言左傳
不疾疾蠱說文作療或是唐蜀本凡夫以為當作疾癰
智按說文瘰癧小腫也一曰族索鉉曰今作疾蠱非是今
內經曰烝成瘰癧乃瘰即疾蠱之病也

手毒手心熱者 黃帝醫書有官能之篇曰疾毒言語
輕人者可使唾癰咒病爪苦手毒為事善傷者可使按
積抑痺各得其能其名乃軫何子元曰手毒可使試按
龜五十日而龜死手甘者復生蓋人手心有火故能運

脾助煖有極熱者按物易化

悻盧言愁鬱都盧之狀也

說苑景公畋梧丘坐睡夢

五丈夫北面悻盧唐人以撮口不快為都盧此言悻悻而都盧也

目望陽曰望視 見春秋傳今日羊眼人賈山傳戴目而視言遠望仰視也

飲泣猶吞聲也凡聲之吞轉皆可曰飲 賈捐之傳飲泣巷哭師古曰淚流被面以入于口故曰飲此解迂甚

然則鼠思泣血甚言淚盡繼之以血思之伏匿如鼠耳
豈真眼中流血邪梁武通聲飲正謂吞喉聲也蔡邕飲
章則匿名章矣

三律者栗髮也 荀子禮論不沐則濡櫛三律而止注
律理髮也今秦俗以批髮為栗髮當是瀝髮楚辭晞髮
瀝之而晞也

尸奪即尸厥也橋引案杭言矯摩也 說苑扁鵲言太
子尸厥耳中焦焦用八成湯砥取三陽五輸子游矯摩

太子復生韓詩外傳作尸蹶倉公傳言尸奪者形敝又
曰鑱石橋引案杙搢荒爪幕案摩也杙音玩則陽篇言
橋起橋運謂矯然而起也管見即以橋然訓之呂覽橋
言無擇高注橋戾也孟竒曰杜蘭香別傳呼藥為消摩
消摩按摩也智按今搜神記作消魔

小遺小洩也漢書東方朔小遺殿上南史謝幾卿小
遺沾令史謂小解也倉公言大小洩前後洩洩溺也左
傳廷以夷射姑旋焉旋洩也莊子之偃謂偃處便也

小通小使也 韓詩外傳言男八歲而齠十六而精化
小通女七歲而齠十四而精化小通水經注曰可以小
使皆言人道也賈誼五餌言偶人無時韓詩言不失時
以偶國語丹朱坊身以儀之儀即偶也夏小正言綏多
士女謂胖合也

盱肩𩑦肩猶脇肩紮足猶重足一迹也 張衡應閒干

進苟容我不忍以𩑦肩𩑦即脇吳王渚傳脇肩紮足猶
懼不見釋注脇與翕同𩑦也脇肩諛笑韻注云鄭玄箋

作胎肩漢書汲黯傳言重足而立謂股弁也義縱石顯傳重足一迹皆紮足之意紮即累

介特言單身也 左个即左介介猶閒也因作界字昭十四年收介特注單身民也一介行李介麋俱與个同此介之為介也因作箇按方言絰挈儼介特也物無耦曰特獸無耦曰介个音又轉為奇古隻字即奇字詳見算數條今閩中呼个如基字可想古音

曰宣曰磬折曰跗曰趺曰脊曰脣曰肉好曰銜牙曰渠

眉之類皆以身狀之 考工半矩曰宣注宣人頭之長也柯半曰磬折謂人之腰也豆足曰跗碑承曰趺瓦亦曰趺斂夾曰脊陶旒有肩錢曰肉好佩中衡者曰衡牙其言面言目言首言耳言口言齒往往而是渠眉玉面之追款也典瑞璧琕以起度駟圭璋璧琕琥璜之渠眉疏璧琕以斂注鄭司農云駟外有捷盧也駟讀為駟疾之駟疏讀為沙謂圭璋璧琕琥璜皆為開渠為眉琢沙除以斂尸令汁得流去也玄讀駟為組渠眉玉飾之溝

瑒也疏曰六玉兩頭有孔為溝渠兩畔稍高為眉智按渠魁顙顙古通凡言渠魁者猶頭目也魁梧魁岸狀其偉也此謂王之瑒欵如人之渠眉然易之丘頤亦謂渠頤也笑曰軒渠皆狀口腮也又唐時謂人曰渠今呼如其或坑蛇反如居亦音基區亦通丘之類以此益信古渠魁丘其顙馘之為一聲稱謂之始人身之形與天地閒之形皆相因呼之溝渠背面無不通合如培塿陪尾猶人之背負微高也溝洫志商顏山額也陳遵傳井

上曰眉五行志旁著岸脇尾間如人之後穴尾上有間口也間之因呂猶門之因眉

短罷猶短痺也 司樂注少師曰陂讀為短罷之罷此言短痺也痺轉為脾音故罷轉為擺音方言嬾嬾通語也其時已有此音矣古罷但音罷借為疲今讀罷為彼駕反亦後來之轉也方言委痿謂之隄企又曰隄陴也企與跂同隄本音跂而轉為愷猶矮本从委而今呼為藹也隄有愷音痺有擺音故痿有矮音後漢書童謠見

一疇人上天注即矮人足徵古齊微韻而後轉皆來韻也詳見諺原

金口即噤口 荀子金口蔽舌金即噤古噤吟隨用素問呿吟閉口為吟韓非子楊權篇公子既眾宗室憂吟太玄吟首皆與噤同史晁錯傳恐天下之士噤口不敢復言日者傳悵然噤口不能言亦作吟說文口閉也退之聯句直辭一以薦巧舌干皆吟梁冀傳口吟舌言謂語吃也亦噤意墨子近臣則暗遠臣則吟即吟呂覽

審應篇君喏而不喏高注喏開喏閉是喏訛

三盆手曰三淹一作三掩 祭義縑三盆手注三盆手者三淹也九縑每淹大總而手振之以出緒也智按注疏淹一作掩釋文去聲若以今呼當菴鑑反

苛癢一作苛癢疥痒 內則疾痛苛癢古本與陸本皆苛養一作疥痒荷與苛通故借

扼腕一作搯腕扼拏扼擊搯挽搯擊 說文擊从手𠂔聲楊雄曰擊握也烏貫切敬甫但作𠂔今作腕腕左傳

援衛侯之手及挽士喪禮設沒麗于擊自飯持之設握
乃連擊鄭注擊掌後節中也飯大擘指本也沒以韋為
之設握綦繫連結之古文麗為連擊作挽六書故引謾
握乃連擊以擊為古閑切也智按此切乃孫陸等所附
不足據也古文奇字曰擊大篆擊𢦏古文按从司又从
手複矣智因大篆从月知為𣦵訛據儀禮左傳當以𢦏
為正集韻亦作𢦏𢦏但無卓識定其原流耳漢書作臣
者亦象挽形非從臣也明有古文𢦏何故不從史記封

禪書莫不搯腕自言有禁方張儀傳作搯腕亦書作寧
漢書扼拑游談郊祀志四方瞋目扼拑國策偏袒扼腕
隗囂傳王遵與牛邯書吟嘯扼腕搯又作搯乙革切圜
握也喪服傳曰苴經大搯康成曰搯扼也中人之抗圍
九寸

夾脊曰腠凡肉肥臠處曰腠小腹邊肉曰腠鄰肱曰臠
骹骨曰骹腓腸曰踰水腠曰骹踵根曰跟急就曰腠
腠胸脇喉咽髀股腳膝臠脛為柱踰蹠跟踵相近聚注

胛音身非也胛即寅為寅卯加作𩇛詳見疑始腴指腰
腹與肉處如腰俞亦腰腴未可拘腹下肥之訓也直翁
引說文𩇛肩前也徐引詩傳上殺中𩇛今說文本無此
語必錯本也集韻作𩇛皆音偶非是按注疏大庖不盈
毛傳自左膘而射之達于右𩇛為上殺射右髀達于右
𩇛為下殺膘頻小反王蒼曰小腹兩邊肉也髀蒲禮反
𩇛一本作𩇛于小反水𩇛也𩇛音愚智考亦入東韻急
就叶柱聚正愚音轉仄也水𩇛即腓閒顏曰踳一作踳

俱時充反踝戶把反跟音根臄一作臄音牝說文郝崙也去聲黃氏曰膝蓋骨為柱者臄髀之下如屋有柱也爾雅曰髀瘍為微甯戚至髀是已脰骨也脰去聲靈樞經下至髀髀長九寸音曷干與髀混凡夫曰臄訓混臄臄丘媿切鄰脰閒骨也

兩膊閒曰髀肩甲即肩胛 說文膊肩甲也補各切按肩甲即肩胛劉平水曰背胛與胸脇相會闔後漢張宗傳中矛貫胛注背上兩膊閒膊即膊戴仲若以瓦官像

面瘦乃胛肥大令桓江州帖胛痛不可堪而此作書則是臂膊明矣

夜耳言耳垂如掖也猶之耳食耳剝植耳之字法也轉注略夜音惕列子師曠方夜耳俛首而聽之愚謂夜當音掖方與俛首相洽漢志東海夜縣今作掖禮樂志俠嘉夜菡蘭芳注夜如液此但證夜有掖音而嘉夜之意正不必解也植耳見淮南耳食耳剝見史記

頡頏當是頡頏 呂覽明理篇引子華曰亂世之民長

短頤𪛗百疾高誘注曰疾病也長短者無節度也頤𪛗
猶大𪛗選也百疾變詐也智按說文悟逆也音忤字考
曰戾也郭璞曰觸選音晤又音噩莊子作選孫恹遂收
頤字以義推之當是頤頤言真真結愕逆之狀也呂覽
傳抄筆記如顚涿乃督字之類

一瞬即一瞬 呂覽安死篇夫死其死視萬世猶一瞬
也注頤川人謂相視曰瞬一曰瞬者謂人卧死覺也智
按瞬瞬瞬瞬瞬一字莊子曰豚子食于死毋少焉瞬若

棄之而走崔氏曰目動也一本作瞬遠遊篇瞬注即瞬
項羽紀項梁瞬籍又作旬傷寒有潤症孫愐真韻載瞬
瞬為一而去聲載瞬瞬瞬瞬為一公羊傳文七年瞬晉
大夫使與公盟注以目通指曰瞬音舜一作瞬訛作瞬
耳

殭殭握遞病狀也

瓊敷言半卧半起為殭

於帖切殭音葉

智按此景純解方言也凡病而不甚曰殭殭今讀奄帖
又管子八國篇注疾者兩手相拱著而不伸曰握遞道

昭作殄瘠又作殄瘠病也

月客婢變也 說文曰漢律見婢變不得侍祠故以丹的注面謂月事也神仙服食經曰仙藥有陽丹陰丹陰丹婦人乳汁也婦人十五已上下為月客有事月客絕上為乳汁變曰家山道地以留情嶺名雙乳靈源左乳下蘆花為右乳下結藥在乳

尸解猶言蟬蛻也 問奇集尸解音假方穀城宗之智按蓋因後漢注尸解者言登仙假託為尸以解化也此

以假解之豈音假乎又前書燕人為方仙道形解銷化服虔曰尸解也張晏曰如山中龍解骨則以尸解注形解甚明又按唐張果卒好異者奏以為尸解胡三省注曰解佳買反仙家所謂尸解譬猶蟬蛻蟬飛而蛻在也此說此音最是故特表之漢讀時有方言陸德明一切取之而又誤取誤音學者不考其原而反執異音相駁邪虛舟子曰蛻形見氣蛻氣知神蛻神歸空蛻空明理蛻理還物則踐形者神也談引道家曰形神離則死而

老曰死而不亡者壽大耋訶鬼窟神我止須窮盡此心
乃能不惑

步引道引也 漢志有黃帝雜子步引十二卷梁肅有
導引圖序曰朱少陽得其術于黃帝外術又加以元禽
化禽之說乃演而圖之隋志有引氣道引圖唐六典有
按摩博士一人華陀六禽之戲此步引之一端也抱朴
子曰黃帝論導養而質玄素二女著體診則受雷岐真
西山曰養生說出于老子谷神章莊子曰伏戲得之以

襲氣母黃帝得之以登雲天列子天瑞篇引黃帝書曰
谷神不死是謂玄牝則此語有由來而老子引之耳智
按神仙方伎也莊子提養生之主明矣

祝福因為祝由祝尤咒尤 說文福祝福也即祝由內
經有祝由徐文長引物原曰禁咒名越方漢武信南越
而禁咒方始智按後漢傳趙炳善越方漢書有禁方古
有祝科至漢通外國而更奇如西域幻人之類南史薛
伯宗徙癰柳樹上洪邁夷堅志漂陽巫犁竈灰而骨鯁

愈亦其類也今太醫院第十三科為祝尤又曰咒尤為咒而愈病如周禮之祝也

厭代猶厭世也 王皞太宗厭代之夕事出曖昧史照

以厭為厭魅胡三省曰謂升遐也并觀瑣言曰厭世字出莊子千歲厭世去而上仙唐諱世為代猶言即世棄

世捐館之詞三省未引及此或曰順世即厭世之稱

𠵿肉烟上之俗猶捐毒之茶毗也 異聞錄引列子曰

楚南有炎人國親戚死𠵿其肉棄之秦西有儀渠親戚

死焚之燠則煙上謂之登遐然後為孝𠂔音寡博物志
亦引此言事見墨子周日用曰佛國之法可知是上古
外國之俗也智按列子作𠂔依小篆作𠂔訛為𠂔即𠂔
字山海經有𠂔塗之山注與𠂔同月令其臭𠂔陸作𠂔
可證商氏書音寡誤矣或讀𠂔字古𠂔與𠂔相通如𠂔
之音枯猶枯與𠂔相因𠂔與丘相借也韻略拾遺周禮
之商即𠂔字孫愐作𠂔

通雅卷十八